

HITZ BITAN

Ingurua zikintzen duten garbigarriak

ERAKUSKETA. Etxeko garbigarren arriskuaz ohartarazteko zabaldu dute, Basaurin

Asier Iturriagaetxebarria | BASAURI

Etxea garbitzeko egunero erabiltzen ditugun produktuen arriskuaz ohartarazteko, *Kimikoak etxean: bizilagun arriskutsuak* izeneko erakusketa zabaldu zuten Ekologistak Martxan taldeak eta Sagarrak talde ekologistak, atzo, Basauriko Ariz dorretxean. Manuel Lara Ekologistak Martxan-eko kideak adierazi zuenez, egun «gaixotasun eta obsesio» bihurtu da etxearen garbiketa. «Lehen produktu bi zeuden etxe guztia garbitzeko. Gaur, ordea, ehunka dira dendan aukeran dauzkagun garbigarriak. Eta herritarrek konturatu behar dute garbitzeko erabiltzen ditugun produktuak gizakiarentzat arriskutsuak direla, toxikoak direla».

Adibide moduan jarri zituen komuna garbitzeko erabiltzen ditugun disolbatzaileak. Produktu kimiko horiek uraren ore-

ka bakteriologikoa apurtzen dutela agertu zuen. «Bakterio horiek dira hondakin uren deskonposizioa egiten dutenak. Eta komuna garbitzeko produktu kimikoak erabiltzen ditugunez, askotan ezinezkoa da hondakin uren deskonposizioa».

Arropak garbitzeko xaboiak ere aipatu zituen Larak. Horiek ere osagai kimikoak dituztela azaldu ostean, produktu toxikoak dituen xaboi batekin arropa garbitzeak ehunka arrainen heriotza ekar dezakeela azpimarratu zuen Ekologistak Martxan taldeko kideak. «Gogoan dautela 'osagai ekologikoak' zituztela zioten arropa garbitzeko xaboiak iragarkiak ematea. Egia da besteek baino gutxiago kutsatzen dutela, baina toxikoak dira».

Etxea garbitzeko erosten ditugun produktuak erabiltzeak bakarrik ez duela arazoa sortzen agertu zuen Larak, eta gar-



MARISOL RAMIREZ / ARGAZKI PRESS

Garbigarriek ingurumenean eragiten duten kalteaz ohartarazi dute.

bigarren ontziek eragindako problema gogoratu zuen. Besteak beste, osagai kimikoak dituzten garbigarriak ezin direla birziklatu azpimarratu zuen, eta erabilitako ontziak Bizkaiko Diputazioak kudeatzen dituen Garbiguneetan pilatzen direla azaldu. «Hala, lurrak osagai toxikoak xurgatzen ditu, eta, azkenean, akuiferoetara ere hel daitezke. Horrek kalte handia eragin diezaioke gizakiari», ohartarazi zuen Larak.

Konponbidea: betiko garbigarriak erabiltzea

Horrenbestez, Garbiguneetan dagoen «kontrol faltaren arazoa» konpontzeko eskatu zion Aldundiari. «Ez hori bakarrik. Gure agintariek gehiago inplikatu behar dute etxean erabiltzen ditugun produktu toxikoen arazoan, eta herritarrek sentsibilizatzeko kanpainak egin behar dituzte».

Larak argi dauka zerk eragin duen herritarren garbitasunerako grina, eta sistema kapitalistari egotzi zion: «Supermerkatu batera sartzen bagara, komuna garbitzeko produktuen apal osoa ikusiko dugu. Gaur egun, negozioa da etxearen garbiketa». Bestalde, etxea garbitzeko betiko produktuak erabili behar direla aipatu zuen. «Olioia eta limoi ura baino garbigarri hobetik ez dago, adibidez».

ENERGIA

Boroako zentrala eraikitzen hasteko baimena lortu izana albiste ona da, Josu Jon Imazen hitzetan

Josu Jon Imaz Eusko Jaurlaritzako Industria, Turismo eta Merkataritza sailburuaren esanetan, «Boroako zentrala eraikitzen hasteko baimena lortu izana albiste pozgarria da euskal gizartearentzat». Sailburuak adierazi duenez, «ESB enpresak 360 milioi euro inguru erabiliko ditu enpresa egiteko, eta horrek asko lagunduko dio Euskal Herriko ekonomiari».

ATXILOKETAK

Ustez haxixa trafikatzegatik bederatzi lagun atxilotu dituzte Bilbon eta Malagan

Espainiako Poliziak bederatzi lagun atxilotu ditu Bilbon eta Malagan, ustez haxixa trafikatzegatik. Poliziak adierazi duenez, taldeak haxixa eramaten zuen Malagatik Bilboraino, eta gero Bizkaian banatzen zuten. Operazioan 53,5 kilo haxix, 4.680 euro eta bost ibilgailu konfiskatu zituen.

Gezurrezko pistola batekin Ertzaintza mehatxatu zuen gazte bat atxilotu dute

Eusko Jaurlaritzako Herrizaingo Sailak azaldu duenez, Ertzaintzak 36 urteko J.F.O. atxilotu zuen astearte gauean Biasterin. Gizonezkoak taberna batean zegoen jendea mehatxatu zuen gezurrezko pistola batekin, gaueko hamabiak aldera, eta ertzainak bila joan zirenean haiek ere mehatxatu zituen.

SUTEA

Bi lagun zauritu dira Azkoitian sute baten ondorioz

Azkoitiko Bizkargi kalean izandako sute batean, bi lagun zauritu ziren astearte goizaldean. Suhiltzaileek bizilagun guztiak atera zituzten arren, bi lagun ospitalera eraman behar izan zituzten, eta kalte materialak oso handiak dira. Ertzaintzaren esanetan, sutea manta elektriko batek eragin zuen.



RAUL BOGAJO / ARGAZKI PRESS

HEZKUNTZA

Iztuetak ikastetxera gerturatu eta irakasleekin «elkarlanean» aritzeko eskatu die gurasoei

Anjeles Iztueta Eusko Jaurlaritzako Hezkuntza sailburuak bilera egin zuen atzo Araba, Gipuzkoa eta Bizkaiko gurasoen elkarteekin. Haiekin egon ostean, Iztuetak dei egin zien guraso guztiei, euren seme-alaben hezkuntzan inplikazio handiagoa izateko eta irakasleekin «elkarlanean» jarduteko. Horretarako, Iztuetak uste du beharrezkoa dela gurasoak ikastetxetik gertuago egotea, eta gauza bere iritzi diote guraso elkarteek ere. Honako hauek izan ziren sailburuarekin bileran egon ziren erakundeak: Euskadiko Gurasoen Elkartea, Europako Ikasleen Gurasoen Elkartea, Euskadiko Irakas-kuntza Libreko Ikasleen Gurasoen Federazioa, Arabako Kontzertatutako Irakas-kuntzako APAS elkarteak eta Eskola Kontseilua.

SUTEA

Bilboko denda batean gertatutako suteak leherketa eragin du

Bilboko Otxarkoaga auzoan sute bat gertatu zen atzo, *Dena ehunean* denda batean. Ertzaintzak eta Udaltzaingoak jakinarazi dutenez, Ezbeharrak 14:00ak inguruan gertatu zen; inork ez zuen zauririk egin.



IRAGARKIA

XEDEA: ENERGIA ELEKTRIKOA BANATZEKO ZENTRALAREN SUBESTAZIOA LEKUZ ALDATZEKO PROIEKTUAREN IDAZKETA KONTRATATZEKO LEHIAKETA

PROPOSAMEN AURKEZPENEA: 2002ko urriak 24 arte (hau barne)

TOKIA: Tolargi S.L.-aren bulegoetan, Tolosako San Juan kalea 2.

PREZIOA: 120.000 EURO

KONTZESIOAREN IRAUPENA: Proiektuak idazteko epeak hurrengo hauek dira:

- Hiru hilabete oinarritzko proiektua idazteko, kontratuaren adjudikazioa formalizatzeko kontratua sinatu eta hurrengo egunetik aurrera.

- Lau hilabete exekuzio proiektua, segurtasun eta osasun proiektua eta kalitate kontrolaren programa idazteko, Tolargi S.L.-k aurkeztutako oinarritzko proiektuaren onespren-adostasunaren idatzia adjudikaziadunari jakinarazten zaienetik.

- Obren zuzendaritza fakultatiboak obrak bukatu eta onartu arte iraungo du, indarrean dagoen legeriak aurreikusten dituen berme epeen barnean.

- Obra bukatzerako planoa obraren behin betiko likidazioarekin batera aurkeztuko dira.

ARGIBIDEAK: Baldintza Teknikoak eta Ekonomiko-Administratiboak interesatuen eskura daude Tolargi S.L.-ko bulegoetan, Tolosako San Juan kalea 2.

Tolosa, 2002ko urriak 7

TOLARGI S.L.-ko LEHENDAKARIA
Antton Izagirre Gorostegi